



## IV GOVERNO CONSTITUCIONAL SECRETARIA DE ESTADO DO CONSELHO DE MINISTROS

---

### KOMUNIKADU IMPRENSA

Soru-mutu Konsellu Ministrus loron 09 fulan Dezembru tinan 2009

Konsellu Ministrus hala'o soru-mutu iha Kuarta-feira, loron 9 fulan Dezembru tinan 2009, iha Sala Soru-mutu Konsellu Ministrus nian, iha Palásiu Governu Díli, hodi simu bainaka boot Representante Espesiál Sekretáriu Jerál Nasoens Unidas no Xefi Misaun Nasoens Unidas nian ba Timor-Leste, ne'ebé sei substitui hosi Ameerah Haq, Representante Espesiál Sekretáriu Jerál Nasoens Unidas nian foun, ne'ebé sei to'o iha Timor hahu iha tinan foun.

Bainhira hala'o nia despedida, Primeiru-Ministru Kay Rala Xanana Gusmão konsidera katak: "Señor Atul Khare, hanesan advogadu boot ida ba Timor-Leste, ne'ebé la ta'uk atu hola pozisaun ida maka'as, hodi fó apoiu ba ita nia nasaun".

Atul Khare, hato'o balansu finál ba ninia atividade ne'ebé nia hala'o iha Paíz durante nia missaun, hodi afirma katak: "Timor-Leste atinje tiha ona etapa foun. Ita lalika tan ona buka restaurasaun ba estabilidade. Timor-Leste, iha administrasaun husi nia na'i ulun boot nasaun nia ukun, daudaun ne'e hala'o servisu hodi konsolida buat hirak ne'ebé manan iha pasadu no atu garante tranzisaun ida ne'ebé mak kaman, atu harii nasaun no dezvoltimentu sósiu-ekonómiku". Sei hanesan Xefi Misaun Nasoens Unidas nian ba Timor-Leste, hato'o mós katak: "Iha lideransa matenek husi Primeiru-Ministru Kay Rala Xanana Gusmão nian, Konsellu Ministrus ida ne'e, aprova mós estratéjia ba médiu prazu endossada husi Konsellu Seguransa, iha fulan Feveiru tinan 2009". Iha ninia diskursu ne'ebé hato'o ba membru Konsellu Ministrus, Atul Khare konklui katak: "Estratéjia médiu prazu ida ne'e hanesan inísiu", hodi hakarak "loron ida wainhira nia fila fali mai, sei hetan país ida ne'ebé la'o ba oin liu tan iha justisa no prosperidade".

Iha momentu despedida, Atul Khare hakarak duni kumprimenta Sua Eselénsia Primeiru-Ministru Timor-Leste, nune'e mós nia membru sira hotu Konsellu Ministrus nian, ne'eb'e marka sira nia prezensa iha sala Konsellu Ministrus.

Kuarta-feira ida ne'e, Konsellu Ministrus aprova tiha ona mós:

1.Rezolusaun ne'ebé aprova Konseitu ba "Empregu" Forsas Armadas:

Programa Governu estabelese medidas atu adopta, kona-ba defeza nasionál, restruturasaun sektor defeza, hodi reforsa knar Forsas Armadas nian, presiza atu klarifika iha missaun ne'ebé de'it mak atu bele emprega medidas hirak ne'e. Reforsu ida ne'e ba knar Forsas Armadas nian, hala'o tuir adopsaun ba desizaun polítika estruturante, kona-ba enkuadramentu jurídiku, defisaun konseptual no konkretizasaun ba kestaun téknika no operasionál, ho karákteer institusionál.

Iha sentidu ida ne'e, define Missaun Jenérika no Espesífika F-DFDTL nian mak hanesan hirak ne'e: missaun ba interesse públiku, missaun ba apoiu manutensaun ba pás, missaun umanitária, missaun ba kooperasaun no missaun ba jestaun krize. Ho difinisaun hirak ne'e, bele dezeña ona estrutura ida, no define Sistema Forsa Nasionál no nia Despozitivu, nune'e mós bem umanu no material nesessáriu, hodi kumpri missaun ho padraun ne'ebé elevadu no efikas.

2.Revogasaun ba Rezolusaun ne'ebé Aprova Termu Ezekusaun ba Akordu Selebradu ho KYTBW no Assosiadu sira.

La iha KYTBW no assosiadu sira, investidor ne'ebé mak sediadu ona iha Tailândia, atu kumpre akordu dezenvolvimentu infra-estruturas no nesessidade enerjética ne'ebé celebra tiha ona ho Governu Timor-Leste, Konsellu Ministrus decide tiha ona atu revoga Rezolusaun ne'ebé aprova iha termu ezekusaun ba akordu no determina katak, osan ne'ebé mak kanaliza ba nia ezekusaun, tenke fó fali ba Fundu Konsolidadu Timor-Leste nian, ne'ebé mak tau iha Autoridade Bankária no Pagamentu.